



QUARTA LINGUA 2018

L'onn da gestiun ha cumenzà cun la radunanza generala da la Quarta Lingua (QL) che ha gì lieu ils 15 da mars 2018 a Turitg. Suenter la part statutara han ils preschents pudì giudair ina prelecziun musicala cun il scriptur Benedetto Vigne, sustegnì da la QL, e cun la musicista Astrid Alexandre. La suprastanza ha salvà durant l'onn da gestiun trais sedutas ordinarias. Confurm a sia incumbensa da promoziun ha ella approvà il 2018 diversas dumondas da contribuziun ed accordà en total CHF 6'000.-:

- operetta ad Ardez „La già magica“: CHF 2'000.-
- Susanna Fanzun, per il film „Shaolin a Tschlin“: CHF 1'000.-
- Jürg Gautschi, per il toc da teater „Fitness – the Art of Being the Best“: CHF 1'000.-
- Dis da Litteratura 2018 a Domat: CHF 1'000.-
- Rino Darms, per „In cudesch plain dumondas“: CHF 1'000.-

La manifestaziun cunter l'iniziativa No Billag, iniziada dals presidents da la QL, da la Lia Rumantscha (LR), da la Pro Svizra Rumantscha, da la Giuventetgna Rumantscha, da l'Uniun per la Litteratura Rumantscha e da l'Uniun da las Rumantschas e dals Rumantschs en la Bassa ensemen cun la Pro Grigioni Italiano ha gì lieu ils 8 da favrer 2018 en la staziun principala da Turitg, e quai durant otg uras e cun il sustegn da numerus musicists e referents rumantschs. Ella è vegnida messa en pe da voluntarias e voluntaris senza indemnisaziun da vart da la QL, è vegnida sustegnida il di sco tal da numerus voluntaris che han repartì flyers ed è vegnida promovida finanzialmain da la LR cun daners d'ina ierta. Nus profitain da questa chaschun per engraziar anc ina giada cordialmain a tut ils presidents e voluntaris per lur sustegn efficazi! Questa acziun ha reunì las uniuns rumantschas. La manifestaziun dals „Cineasts rumantschs“ cunter l'iniziativa No Billag a Cuir ails 3 da favrer 2018, a la quala ha fatg part tranter auter la cussegliera federala Simonetta Sommaruga, è vegnida sustegnida idealmain da la QL, cunquai ch'il futur da RTR, la vusch da las Rumantschas e dals Rumantschs, era periclità.

Il 1. da schaner 2018 ha la QL lantschà sia nova pagina-web bilingua rumantsch-tudestga. Sin Facebook ha ella stgars 475 fans.

Ils curs da rumantsch èn vegnids realisads fin l'onn da scola 2017/18 cun diesch fin dudesch uffants. A partir dal 2018/19 èn stads annunziads mo pli sis uffants. Ils daners dal fond da lottaria èn duvrads si e la QL na po e na vegn betg a pajar pli insatge per quests curs. La LR sustegna ussa quest curs en fin la fin da l'onn da scola.

Suprastanza

Presidenta	Petra Camathias
	Barbara Cuffaro-Strebel
	Nathalie Killias
	Kaspar Silberschmidt
	Ivana Cabalzar
	Bettina Vital
	Ivo Zen